

桐梓縣志卷四十四

文徵上集

記

明

西南平播記

蹇達

皇帝聖神文武輯寧宇內華夏蠻貊罔不率俾往時賊據寧夏島夷犯朝鮮先後戡定卽東虜突闖遼左今御史大夫兼右司馬長垣李公時以中丞撫遼督大將追勦斬首五百餘級以奇捷聞自此諸虜咋舌無敢內訌獨蜀徼播賊楊應龍憑險負固輒縱部落屠剔我邊毗直指王公趙公先後以疏聞上一再聽督撫諸臣相機撫處舞干敷德不欲遽動兵也賊逾恣叛逆飛練之役敢格殺我戰士且及材官矣諫議張公以疏請上西顧

桐梓縣志

卷十八

文徵志

三

宵衣謂公故撫遼破虜奏膚功特允廷推起公於家以少司馬兼大中丞總督四川湖廣貴州軍務公以己亥六月初十日兼程臨成都賊再屠綦江城參將房嘉寵故遊擊張良賢死之公督藩臬諸大夫亟議所以足兵足餉之策疏請速剿尋直指崔公按蜀疏奏一如公議上悉嘉納聽公便宜行事大學士趙公沈公協襄宸斷大司馬田公蚤決計謨大司農陳公預發兵餉太宰李公御史大夫溫公掄材紆畫蓋自九列而下無不念明主宵旰冀西土廓清者公乃以計緩賊迄所徵漢士兵雲集公分蜀黔楚進兵爲八路四川以綦江路屬總兵官劉縱合江路屬總兵官吳廣永寧路屬原任副總兵曹希彬南川路屬聽用總兵官馬孔英以參政張君棟護綦南謝君詔護永合軍事參政張君文燿參議劉君一相副使史君旌賢僉事徐君仲佳督

餉兼紀功總餉兵於成都則左布政使前程君正誼今盛君世承按察使沈君季文紀功於渝則參政王君嘉謨副使傅君良諫督餉永合則參議熊君宇奇若渝守傅君光宅分理四路餉兵推官高折枝並贊理南川路監紀之事其黔楚二鎮則貴州烏江沙溪平越爲三路屬總兵官李應祥以按察使楊君寅秋參議張君存意護軍事督餉兼紀功則以參政郭君廷良副使洪君澄源尤君錫類參議梅君國樓湖廣偏橋爲一路屬總兵官陳璘以按察使胡君桂芳參議魏君養蒙護軍事督餉兼紀功則以參政詹君啓東副使王君應麟路君雲龍陳君與相蓋中丞郭公支公並以咨會受公成焉公以十二月二十三日移鎮重慶庚子正月十五日奉賜劍登壇而盟曰皇帝憫西南赤子爲播賊所荼毒無寧歲所委任責成者甚重若等曷哉其一

乃心力以相予行天罰否則三尺具在不敢私至以主辱臣死自盟諸將士聞之無不感動願爲公盡力者公又熟計征播主殲渠魁而海龍囤夙稱天險逆賊謂此囤不可升必據囤以延須臾之死必諸將集團下乃可協擒而楠木山羊簡臺等洞爲通逃淵藪婁山巖門桑木等關爲逆賊門戶方擁悍苗以死守非有先入關者何以鼓衆志而速成功此其責在蜀將湖廣偏橋內外俱九股苗遺種賊恃爲外援內四牌不掃卽三渡未易窺無由抵海龍囤貴州夷狡而兵寡兼苦軍興又水西與逆賊世依唇齒必操縱在我始足以折安酋而奪逆賊之氣是又楚黔諸將之責因進縱及廣等檄璘及應祥等授以碩畫郭公支公並以機宜示黔楚諸將諸將奉約惟謹以二月十二日遵令進兵總計八路漢土及燕趙越粵秦汴滇南馬步卒廿餘萬督

餉張君等焦思蒿目曾不後時師行糧從戰士踴躍故鷹揚虎賁朱整玄甲並盪摩朗耀於巴渝黔楚之間焉一切零賊諸路日多斬獲其自縛請降者悉受而生全之二月十四日縉督兵攻楠木山羊簡臺等洞破之迨朝棟率諸苗衝營縉復督勁兵大破之而桑木關山險箐深仰攻爲難折枝祇奉公檄身先參將周國柱等前已大敗賊於官坵營望草坵遂乘勝衝關之左右兼擣其中以三月初八日破桑木關適孔英至自關中又敗賊於金子坵蓋南川路視諸將先登入關二十九日縉亦破婁山關矣四月初一日廣兵薄巖門郭通緒者敢戰當關廣伏兵攢槩刺之以初四日破巖門關再力戰於水牛塘因據三圓山山倚海龍岡高岡數十仞賊所恃爲左右望者郤苗萬餘列柵堅守廣督希彬等奪以勁兵而綦南二路仍各發兵三千助之

遂據此山之上俯視岡中樵汲從此斷絕而南川路衝其前鋒綦江路爲左右翼擊賊永合二路併攻復連破養馬養雞等城海門龍鳳等關賊不復敢格鬥洒淚率妻子夜退棲岡上而以鐵鑄關爲守岡倚諸崇山又鬼方多淫雨白日晦冥兵將集岡外未敢先發先是崔公甫臨成都卽移檄諸將不許干後時之誅公慮蜀四路各自爲心檄按察使張君悌糾合諸將縉及廣等督兵夾攻鐵鑄關破之雖賊黨已奔潰而岡前重岡複嶺較岡後尤甚賊日夜守以梟鷲藏礮伏弩俯瞰我兵分擊之如雨以是將兵盡銳仰攻尙未遽克適公聞先大夫艱又慮諸將解體拔淚草檄刻期破岡且懸重賞激先登者並檄責廣充爲事官以懲其報曾死之誤崔公更嚴檄諸將急攻毋爲賊誘諸將愈人人畏罪會璘前受計於公支公及直指王公檄責竟以一

旅之師掃九股苗開路進兵而中丞江公以撫偏沅臨鎮復與公及支公計合遂連破長坎馬瑙青蛇三圍所向無前公郭公操縱水西直指宋公並嚴檄諸將吏使水西大敗賊於母氏圍殲虎翼以寒賊膽而應祥又以招撫爲進攻連破諸圍入三渡關抵白田埧與璘俱集回下護軍張君等遵公指授會五總兵督各路副參遊守暨宣慰等輪日協攻先之以綖及應祥繼之以璘及廣所將兵攻其後折枝孔英督各漢土兵攻其前以六月初五日綖等前後夾攻破其二城初六日廣及璘協攻而六路兵亦爭先以雲梯攀援而上逆賊橫槩四顧無一死黨計無復之始維經而死廣兵及各路兵於烈焰中取酋屍一軀兼縛田氏朝棟兆龍等而巨黨何漢良田一鵬孫時太馬千駟等一面縛賊遂無噍類矣是役也獲大賊首一生擒賊首一千二

百餘名斬級二萬二千六百計俘獲賊屬五千五百計招降男婦十二萬六千計全獲被擄男婦一千計拓地千餘里公露布以聞獻俘京師上大說以平播功告廟百官畢賀斬朝棟等於市已頒詔海內及巡按御史公勘報績制府中丞列鎮監司而下論功爵賞有差初播州故爲漢唐郡縣自乾符間陷於南詔楊端取而據之遂爲夷穴公議改土設流爲府二州一縣八衛一特請於上易府名遵義平越列雉爲城設總兵憲使坐鎮之仍設學置博士弟子員於是修文偃武綏輯遐阯仁懷珍州之間稱一都會焉夫西南諸夷盤據於萬峰疊嶺中緩之則怒臂吹聲毒我邊疆討之則據險憑寨踉蹌而鬥敗則豕奔鼠竄窮蒐曠日故自古用兵未有其得志者毋論麓川之役罪人竟漏天誅卽正統間徇都蠻爲梗大司馬提虎旅十八萬討之久而

始克然根株未撼俄復嘯聚夷患所由來矣方逆酋之扞文罔也一再撫之不效自宜改絃乃當事者顧忌迂徐迄酋盈惡逆逞又倉皇加兵漸損威重公初臨錦官料賊情若觀火操成算若析薪賊已在公掌握中矣第蜀往歲平蠻多藉兵於土司見無他兵可恃所調土兵含悲狐兔且視以爲奇貨陽戰而陰利之甚至藉口乏餉濡滯遷延卽幸而成功又皆謂吾土兵之力寧復知縣官哉公是以請調客兵雖數只二萬而先聲叵測蜀漢兵謂四方兵且至其氣愈壯重以餽糧惟時土兵亦無敢桀驁卒相濟以成功而默消諸酋長跋扈飛揚之心所爲國家慮爲西南慮者何其忠懇也計兵二十餘萬日費二千金稍淹歲時遽滋勞費公苦心殫力所以激將士之用命折債帥之邪謀散羽翼之羣兇寢鄰酋之陰庇者率炳幾先而冥中其會故師

期僅及三月費僅踰一百萬而殲八百年大慙若摧枯拉朽且拓地張官一以中國之治治之瘴雨蠻烟之鄉永爲樂土公之功不宏且遠哉而公不自功也蓋昔召公受命平淮夷故其詩曰明明天子令聞不已裴公平蔡功韓愈獨以不赦不疑歸美於憲宗之斷豈不以武功告成固召公裴公之勞然非周宣唐憲知人善任亦曷以臻茲哉上御宇中興媲美周宣非憲宗所敢望而平播之伐知人善任則與召裴之平淮蔡異代同符公曰非臣與諸將士之功而皇上之功有味哉公之疏也大臣不當如是耶播故在渝境渝人尤觀播功而感公賜沅陵張君舊以巴令垂聲茲則以播之役自粵西移渝而佐公運籌轉餉奏功者謂合守知巴縣事葉聯芳宜伐塗山之石紀功勒名以永渝人之思而謂不佞達宜有言遂悉其顛末而銘之其辭曰惟

皇憲天秋殺春生九夏八挺快靚昇平東征島夷西誅孽賊掃
穴犁庭匈奴折摺么魔小醜叢爾夜郎狼毒我毗獺闖我疆帝
謂蠢夷且無窮武其命諸臣相機撫處舞干解網仁自舜湯彼
昏無忌敢逆顏行臺省疊聞皇嚇新怒心膂股肱訂謨以助乃
命司馬汝昔撫遼鞭笞左賢威震功超汝往專征國之大事尙
方寶劍特茲以賜公拜稽首夙駕渝州闔外集思帷中運籌插
羽徵兵飛檄督餉矢天誓師開誠命將桓桓元戎洸洸武夫如
熊如羆臨坤之隅組練生光馬騰士飽鼓行無前魂銷羣僚旣
斬層關遂拔列城風鶴咸順草木皆兵魍魅微糜寨柵披裂取
彼凶殘鏖膏刃血累卵一髮賊勢瀕危尙倚兔窟螳臂以支我
武載揚霆擊雷礚會以六師圍之三匝黨惡千羣駢首伏鈇疾
若呼風易若摧枯黔旅重來楚歌四起盡赭其山兼赤其水殲

厥渠魁縛彼羣兇脅從罔治巢穴都空于疆于理乃文乃武漢
官重列威儀再覩柔桑沃壤而織而耕歸馬放牛絃管春城昔
也播地猿啼虎視今也市廛龍編鱗次昔也播人畏首懷疑今
也殮粥鼓腹含嬉昔也播俗缺舌馬革今也文物詩書繼掖播
人自謂西南諸夷陽收羽翼陰實傾離彼昏鞠頑天奪之魄竟
墮術中遂取族赤威靈濯濯王道平平逆則誅鋤順則生全轉
相告語強衆弱寡強且不支弱何爲者自時厥後誰敢不共覆
車不遠鑒此應龍霽布星馳夜同清晝共識天顏喜茲凱奏公
躬踧躅匪臣之力獨蒙聖斷乃得稱塞帝謂司馬惟汝元忠克
茲壯猷奏是膚功甫出東山遽安西土召虎晉公異代爲伍赫
赫奕奕公功之垂繼繼承承蜀人之思采之輿論銘之野史億
千萬年塗山巴水

手爬巖記

陳啓相

道無非險也而蜀稱最最尤在於夜郎一境今自遵距蜀邑之仁懷八百里許峰高迴日澗邃根雲割愁繫悶水石交橫一線蜿蜒曲折鉤窟杳冥目不暇瞬足不暇躡當八百里之平地名手爬巖耳之雖令人笑卽亦不寒而栗矣道無非險也而名以手爬異哉莊生之言曰足踐也足之所不躡謂爲善博者恃有餘地茲獨不任足而任手豈惟足幾不欲有其目與膝之爲累寄我愁心除是隨風直到一鳥身輕噫歔欬巨靈一掌開法手印後皆以五輪印印之誰敢不然將行旅人悉化宮人是曰魚貫化面壁是曰蝸觸化卦影是曰良背名之之義無乃然乎豈無一人能撒手者覺不爬不得也聞昔大將軍省吾劉公曾一經理久乃積壞過者苦之歲壬子余奉簡命協鎮遵土目睹太

桐梓縣志

卷十八

文徵志

三七

白蜀道難一篇已爲是描畫矣有羽衣照空者銳志募修始壬子歲之六月訖明年之九月乃竣道闊丈有二尺磴級凡百三十有奇行李安穩莫不欣快如禍難忽平如病悸忽壯如陸地遊仙如禦寇十五日往來如鳧鳥如雲間老萬回也乃知世間事藏至夷於至險之中伏至樂於至苦之後天地設險人功自神持手爬巖三字一旦拱手告別直誦之曰王道蕩蕩王道平平是不可不記

黃志云此文係代作中似有缺脫處見平水集

按乾隆間邑舉人金曰培奉本府檄修鑿手爬巖險道功力

尤巨

詩者舊鈔

祀盤龍洞記

李銘詩

邑城西南六七里爲葫蘆埧因地形似葫蘆故名地原而隰堪種稻但四山俱乏水一遇春乾則不能布種夏秋早有坐視其

苗之枯耳地形盡處爲盤龍洞洞爲邑景首觀洞左里許有石穴袤闊未及一丈五葫蘆水入焉值淫雨連朝溪漲齊集穴小不能容納則迴瀾四溢甚且淹入城中而苗穀胥屬淤朽是旱澇皆病者莫葫蘆水若也故十年之內報淹報旱者葫蘆奚啻七八逮通計其田不滿二十頃額賦不踰五十兩報不成災歷來府縣尹見而憐之每捐金賑濟然未嘗有預防救患之方也丁亥冬邱侯來令斯邑而次年報旱已丑愈甚其後因奉功令清丈田糧侯乃履畝勸首坐盤龍洞中進居民諭之曰爾民頻年苦淹與旱地實爲之也余爲爾民請於上其定賦悉以下田起科庶免大困又諭之曰斯地之欲免淹旱非人力可以能爲也觀洞之靈秀奇特必有明神焉盍禱祀之歲之仲春侯乃卜日虔誠詣洞首爲民致祭是歲非不早也獨葫蘆填一方果多

得雨秋始有穫父老歡忻載道指所穫曰此洞神之力耶抑我邱侯之賜也遂相率謁詩而語其故詩曰善哉邱侯之爲政也從來政之大節在制祀而箕疇之衍入政也三曰祀蓋祀以爲農用也祭法云能禦大災則祀之能捍大患則祀之夫災患孰有大於淹與旱乎且祀典亦載能興雲雨潤物有功烈於民者山川之神是也斯舉也邱侯可謂忠於民而信於神者矣云胡不誌雖勒石可也

夜郎採楠碑記

天生楨幹之材以備隆棟之用而國家時簡勝任者取之然得之匪易奇偉之產選選生於環山疊嶂絕跡罕到之鄉如幽人碩士之藏用待時隱處槃澗也採取者恆曼曼乎難之我世祖統一海內創業垂統迨皇上纘承不基作述廿有餘年聞風向

化識水來王者卽殊方絕域咸稽首闕下而堂楹尙仍卑陋非所以崇宸居壯觀瞻也在部檄屢下而諸郡率以不材之木應余思楚材管用豈屬在版圖而可使清廟明堂之物委諸草莽乎爰具疏自任卽蜀道難亦所不恤陟嶮崖履嶮巖研踵於豐草長林問舍輿而馬舍馬而步甫兩閱月得大木百有餘株以之充梁棟而資巨任豈復有遺材耶使當事之遴才者果如余之周爰諮諏實心採訪或亦不至有淪落之嘆也疲蕭暇特援筆而誌之一片石

按川志未載撰人名黃志據作述計有餘年句斷爲齊檣踏勘之役

題素園記

唐灼中

素位而行聖人言之吾友素園主人讀聖賢書嘗佩服斯語置

桐梓縣志

卷十八

文徵志

三九

一園無以名因以素名其園內有侯命齋藏書甚富而案頭常置中庸一書以自適齋外自題一聯云養得此心虛似竹生成傲骨勁於梅齋左右手植花竹爲嘉卉也凡有敗種悉鋤之時而天朗氣清軒窗四闢雖百十千萬之倫皆見其素園中景物幽然一塵不染眞有不願乎外之概園後有芳塘不及半畝主人恐園之不潔時汲塘之水以滌其園又名其芳塘曰滌素於戲主人之培修此園也不事雕刻而氣宇光華非主人不能有此園非此園不可以見主人園成邀余酌其間相語曰安得我心如此園余曰素園爲君所有權謂君之心爲素園也可卽謂素園爲君之心也亦無不可酒酣醉筆以誌素園主人爲誰侯君滄帆也誌素園者誰燦南唐灼中也

金氏宗祠記

金衍慶

宗祠在桐梓城南五里許地名舊城當卽古芝城也在昔爲西南彝境虞夏以前無所考焉周秦爲夜郎地至漢武帝四年拜唐蒙爲中郎將通夜郎置牂牁郡舊城地屬焉是時我鼻祖日殫公入漢輔政後受遺詔輔孤昭帝是爲金氏受姓之始唐貞觀三年分牂柯北界置播川鎮旋併播川鎮爲珍州後改爲播州宋宣和六年廢播州爲播川縣舊城故播川縣地也元至元十五年改爲鼎山縣十六年仍爲播川縣明洪武四年以縣地析置播川驛我宗祠卽播川舊地當日播川遷徙無常故名舊城去今之桐梓縣城僅三四里當桐梓未修縣城之先其地名冬青坪爲我貴祖墓山其後知縣何珩創修縣城奉旨遷貴祖墓於北門外官家灣至今石刻猶存清乾隆十八年癸酉虞瑞公與庸功公倡議建祠卜吉於斯以妥先靈是今之宗祠卽昔

之播川舊址也二十二年丁丑知桐梓江蘇金廷梅額其門曰源遠流長五十一年丁未知桐梓縣事京都金科豫匾其座曰衍慶箕裘並題聯於椽曰緬先年世有奇勳臣節君恩不長弄兒之志念後裔人多繁衍秋霜春露當深孝子之思至道光二十三年癸卯仍有公等復加培修家禮云君子將營宮室先立祠堂以祠先世神主蓋取水源木本之意而期靈爽之式憑有藉矣吾家世系淵源長安自稔侯日禪公賜姓受封以來自長安入義門由義門入豐城歷唐宋元明五十有餘世其間功名事業勒於鼎彝孝友忠良載在史策茲不贅述桐始祖大富同叔大貴於明季時由豐城入播築室於茲下世卜年幾二百載雖無名卿顯宦克紹先業而列膠庠膺鸞薦登仕版者代不乏人因思後代之發祥由前人之累德祀典未建享祀何存幸先

輩覓此吉壤修建落成廟貌維新祀事孔明庶義門之家聲不改忠孝之世德常新矣貽厥孫謀克繩祖武是所望於后人焉是記

按是記原本甚長然皆地方往蹟與金氏不生關係故節錄之

松坎小河修路碑記

侯樹濤

松江之右有古路不知修自何時自芭蕉塘踰乾窩溝而下直達小河毘連大竹垠旺草綏陽中達四達綦岸鹽商販運銷售必經此道松坎米糧牛由斯來近因山石崩摧突怒竅穴歷年既久坍塌更多遇天陰雨濕則滑草晴霽則又滑沙臨高而俯視絕壑千尺杳莫測其所窮肝膽爲之股慄稍一蹉跌則隕墜堪虞行旅往往視爲畏途有裹足不前之慨其道之險如此其

桐梓縣志

卷十八

文徵志

四一

行之難如此冷君光釗樂善士也提倡勸募得好善諸君子樂捐從新而培修之始命芟其蕪剷其塗崩塌者負土以築之狹隘者累石以砌之歷一寒暑而歲始厥事丁巳秋落成請余言記之余曰諸君子樂善好施俾山徑成爲康莊將見行人往來有無致之口碑載道也胡記爲諸君曰先生之言是也吾儕非好名但斯路岷巖峭拔異日難免不崩壞請備書原委勸後來之補修者余既不獲辭故樂爲之記

桐梓縣志卷四十四

文徵上集

序

明

婁氏家乘叙畧

婁麟

宗族之有譜者譜其所自來也俾後人見而知之而不忘情於本源也吾族之有本源何在始也肇自軒轅既而傳之夏后歷四百四十一年而商繼之或封或絕又歷六百四十四年而周繼之武王克殷封夏后之後東樓公於杞邑於緣陵以奉夏祀與陳與宋爲三恪於周爲客天子有事膳焉有喪拜焉車服祭器皆與宋同此振鷺之詩所以同稱我客也其郊祀諸禹鈞石守典則之遺其道見諸夏小正埒坤乾之義其初有伯姬之賢

桐梓縣志

卷十八

文徵志

四一

其後有晉悼之惠雖不免淮夷之病猶幸有緣陵之城春秋時成周之城三秦之伐三魚之會虫半之盟以及救鄭侵楚印段厥愍諸役杞皆有微勞惜其後迫近於夷言語衣服有時而遷考之春秋初稱杞侯至莊之十七年猶曰杞伯來朝至襄之十九年遂曰杞子來盟由侯而伯由伯而子皆以其失夏禮也而外之雖曰神明之胄必來無禮之卑或輕之曰夏肆或鄙之曰夏餘獲麟後之二十三年卒爲楚所滅其子孫因前有鳳凰樓之居繼有東樓公之號遂去婁之木而姓婁焉至唐乾符三年天福之孫凌雲之子長殿輝次殿揚我祖殿邦行三受總戎之職鎮江西徐州府沛縣與大將軍楊端征蠻入播播州既復朝旨以楊世守其地又以殿邦祖開拔梓州關險勅爲邊副土司裂播地之壤接綦南五十里名歸化司以爲世守封邑永爲土

官世襲其職遵義與桐梓連界地名高岩山黑神塢生一子名
珊扼守其地取名婁山關與梁宗理同爲守關副將後任安順
提督皆由夏王之根深枝茂源遠流長也麟雖屬明德之後夏
后之裔思光前而徒存奢願欲啓後則實有深心伏冀後此者
繼繼承承勤勤黽黽以讀爲顯榮之具以耕爲豐足之資一本
必相親勿相惡以拂其性九族必相好勿相尤以喪其真則上
可以慰先人於既往下可以昌後嗣於將來不誠麟之厚幸哉
是序 明嘉靖乙卯科舉人婁麟序於焚經草堂

趙氏譜序

節錄夜郎墳應
龍山舊祠碑文

今夫溯水源者必推星宿窮泰岱者必究崑崙示不忘本也吾
姓肇自山西派衍太原昔之擢高科爲顯宦者代有其人遠難
枚舉自唐入播傳及宋代高峯祖陞喬登神宗時甲第官長沙

桐梓縣志

卷十八

文徵志

四三

祖母焦氏同受誥封壽至八十猶產一珠復官彼都諺云父子
長沙是卽吾族共祖也解組歸里沒葬溪源銅台作廟扶歡塑
其遺像宋朝崇德報功勅賜青蓮院以奉忠良之祀厥後支分
五房一遷齋郎一遷幹垠一仍扶歡一遷綏陽杉木台一遷仁
懷吼灘吾祖遷本邑夜郎垠迄今十餘傳矣先有炎卯祖爲宋
嘉定中進士仕祿祖爲明時同知迄今科歲兩考文武之名者
恆不乏人康熙五十五年閩族共議建祠於應龍山仍徼扶歡
遺像剖眞於祠復置祀田地名寺壩寺溝靈祠門首共十畝以
爲春秋祀典蓋本尊祖敬宗之意俾世傳勿朽云雍正十二年
冬廩生趙世綱撰生員趙昌純書

桐梓縣舊志序

邱仲咀

桐舊隸蜀蜀名區也今上御極之五年丁未余奉命候用於茲

嘗俯仰憑眺其間於山見峨眉之高於水見錦江之秀於賦睹
司馬凌雲之奇於文羨長公家學之富仰止殷矣是歲冬川憲
委署桐邑風土人物卓有可稱與茂陵眉山爭勝爰索邑志披
閱僅得前令賈公續郡守孫公之舊而載其畧大概地多雄峯
峻嶺爲夜郎王舊域人文固可見矣且志無刊本只手錄一冊
而傳寫失真不無魯魚亥豕之謬余不揣愚陋爰據改訂尙未
之竟乃迫於勸首查丈之責披荆棘冒霜露日奔馳於窮鄉僻
壤中清其界而均其畝己酉春遵郡歸黔復奉憲命再事清釐
矢公矢慎俾民不爭是役也既越阡而度陌亦覽勝而採風東
上巖巖則望陽谷之日出南躋婁關則信馬首之雲生西過夜
郎弔青蓮之遺跡尙有存焉者乎北渡蒙橋訪吳霸唐蒙之勳
烈至今未泯徘徊者久之竊意登高作賦學士之才也化民訓

俗有司之任也每與父老子弟相慰誨曰惟茲土田雖瘠而山
水秀甚興朝以來沐浴聖化士爭濯磨人恥不學如某之標節
孝某之拔科名其所由來也遠矣尙其敦德行而修文藝以益
增斯世之光衆曰唯唯歲辛亥恭逢上命纂修省志大憲分命
郡縣詳訂邑乘以供採擇余自愧寡聞鮮見不足以參著述之
末爰將夙所訂證備錄以呈復廣搜博稽增補成編以俟班馬
良史修飾潤色焉已耳雍正九年辛亥八月

雪鴻續草自序

傅同形

予北遊歸杜門不出近二十年矣壬午冬馳驅出門經太白遷
謫地過漢竹王城登峻嶺渡大江越五日始抵南平得見老瀛
諸勝卽劉望之所云山盤四十八面險雲暗三百六旬秋處也
遂有南平舟中望瀛山諸作又越二日抵渝州泊舟海棠溪上

偕友人渡龍門登塗山因得神禹之跡而縱觀之卽禹娶塗山氏生啓四日地也周覽縉雲徘徊字水又有客渝諸作歸棟行篋得詩百首遂合夜郎諸什都爲一集題曰雪鴻草蓋取蘇長公人生到處知何事有似飛鴻踏雪泥之句以顏之也去年冬至磁城於季弟兼齋宅上晤硯雲高先生道款之餘劇談風雅書舫齋頭殆無虛日蓋硯雲先生以江南名宿浮沉宦海者近三四十年名山大川足跡幾遍其閱歷也真故其發爲詩歌也切每有所作卽索和章亦得詩百有餘首命子姓輩錄出題曰雪鴻續草猶前意也然予何敢言詩不過藉以誌予就正有道之歲月云耳觀者幸勿以工拙律之可也

虎頭山培修觀音殿序

趙鳴枝

虎頭山神祠後殿原奉有觀音一尊然神像卑而龕座皆樸陋

於釋氏莊嚴之說未合也歲丁亥余偶館於茲鄉耆欲募化而普新之請序於余余曰居其廟者謀其事若職也余雖不文可援筆爲勸言未既有童子笑於側曰觀音之神亦世俗所傳釋氏之支流也其神也棄父命而不顧外人倫以出奇且持虛無幻化之說誘男女各六人爲座下弟子於男女不親授受之義奚當不計人之善惡爲何如但崇奉者卽爲之奔救苦難於正直而壹之義又奚當是何足祀余曰童子烏足以知之凡神聖之崇奉不衰者皆有至奇之行雖不軌於正而亦有難及者焉觀音之神雖棄父命外人倫亦釋氏之道則然其淡於情慾之緣此舉世士大夫未近於聖賢之道者所不能也則其宜祀者一其誘男女各六爲弟子此其人皆強橫暴惡而神能化之且並享祀事亦足以使兇男悍婦觀感而善心生則其宜祀者二

至於救苦難之說乃僧徒託之以爲種福田計耳神果靈也君子則救之小人則否若不計其爲君子小人僅以崇奉而概救之是逆天也逆天則神無靈又烏能救故知神必無此意不可以此疑其不當祀也既當祀則士農工商不當捐貲恐後乎蓋自正道不明而始借神道以設教不奇不足以動人信若並此類而廢之則愚俗益無忌憚也烏乎當第人之爲此者所以求福也誠知福自己求之道大則忠孝友恭小則日用事爲母區區恃此而不修常行且毋謂此遂可以救常行之失則於求福之道庶幾也童子烏足以知之

耆舊詩序

趙彝憑

桐梓耆舊詩前後集成彝憑謹記其目曰孔子刪定國風是爲總集之始其採錄二南而兼及曹鄆足見巨細不遺以後編錄

桐梓縣志

卷十八

文徵志

四六

一州一邑者尤指不勝屈大概以人存詩如吳師道之故鄉錄亦以詩存人如元遺山之中州集况吾桐兩代離亂大半忠貞之士而可聽其淹沒也耶道光辛丑修纂府志鄭柴翁輯郡人詩爲遵義詩鈔時先子則專輯本縣及後柴翁刊作播雅桐梓之詩悉照先子所錄隨又有所得亦寄莫胆翁編入黔詩紀畧先子原刊之編會迭遭兵燹已與播雅版均成灰燼忽忽五十年矣偶然感觸謹將原詩編爲前集並加小傳其在先子之後與前未見者編爲後集播雅有按證是者仍之誤者正之記前集四十二人得詩二百零六首後集四十二人得詩二百六十六首蓋我大清受命以來十八行省惟貴州幅員初定尙覺彬彬可稱考華陽國志所載周秦時巴國土風祭祀等無異於風雅及漢武初郡犍爲便有舍人首注爾雅爲漢經師之祖自時厥

後五教雍和秀茂挺逸英偉既多而風謠旁作豈可謂地淪於夷遂無操觚染翰者而或者謂太白如不召還安知此地不如韓之開潮柳之開柳也苟有繼起者本興觀羣怨之旨以文明此邦豈等於白鄆以下卽無風詩也乎

縣令王孔鑄去思碑序

趙元雋

王公孔鑄字少農山東海陽縣人以中書科掾吏筮仕黔中歷任天柱郎岱政績燦然以光緒三十三年秋九月捧檄來桐時值國家多事政令頻頒益以地瘠民貧賊匪充斥而公獨奮彌天之力舉從前一切敷衍裨政悉更張之力求實際重以躬行新政無粉飾之端民事無宿諾之舉昔年百廢具興日臻治理而其最繫人思者厥有四端曰熱心教育也曰清理財政也曰掃除兇暴也曰簡政清刑也至於剪除差風禁種罌粟開習藝

辦巡警凡所設施無不令行法立或者雖目其苛不知刑亂國用重典諸葛治蜀王猛治秦有以異乎况公齊人也而齊魯最親去聖人之世雖遠近聖人之居乃若此其甚故其行政深有得於先勞無倦居敬行簡之旨謂非學道愛人之君子也乎惜蒞任未幾旋於宣統元年夏五月奉調雖繼任長官仍竟公緒而實際觀察已令人不勝今昔之感迄今公去又逾年也芑黍甘棠不忘遺愛恨不得重飛鳧鳥使邑人得肖鑄巍巍銅像而與此碑共傳於不朽矣序成爰爲之頌曰

公學爲宏治紹文翁高初兩等改良擴充政餘授課圖畫尤工親臨視學台校雍雍公才渾全富於經濟酒稅屠捐持籌取締款項頻增歲贏萬計敷政優優惟公之賜公法無私不軌是夷驅除狗鼠馳越崎嶇刑懲鱷蠹藝罰游嬉訟庭無事花草離離

公德在民義濟以仁官詞不濫煙禁重申民嗟歲歉平糶粟陳
畫堂鴻爪奉若明神

公篤草堂詩序

周西成

余童子時詩賦詞章之學猶盛行入塾數年塾師卽以律古諸
詩相指授講音韻辨體裁一一默識口誦心維津津有味自信
可學而能乃一鄙鄆學步終日苦不得句縱得句又弗能工緣
成智慧聰穎發育較遲始信袁子才先生所云詩主性靈之說
誠不我欺弱冠從戎此道遂廢然暇時恆取古詩歌往復吟咏
復潛心而探討之覺古今之事物物寄託於詩涵泳於詩者
實大而宏要以性靈爲主其妥帖排象自是寢饋於唐宋諸大
家洵非咕唔呶率爾操觚動輒假以自炫也甲子冬季以莊
節光昆仙出其尊甫瑞堂先生舊作問序於余未及展卷回溯

先生之爲人先生郡中之名孝廉其一生敦品勵學崇尚道德
木鐸傳聲裁成後進初未聞以詩見長迨讀竟所著之公篤草
堂雜體詩百餘首愛不釋手心嚮往之先生壯歲攝高科遨遊
名山大川閱世殆已甚深值夫中東戰役台灣失地關懷時變
慨乎言之餘如酬答唱和雜感叙事觸類引伸質而文簡而賅
先生殆亦作者之林矣篇什雖微一付剞劂將偕子尹淳齋諸
前輩之遺編傳之無窮嚮遺後學是則區區之微意爾爰泚筆
而爲之序

素園詩草叙

貴陽 黃澤書

人離性奚爲人詩離情奚爲詩是歲春余因舊友得識桐梓侯
滄帆先生廬山相見蓋居身夷惠之間及出示諸作性情所至
人言合符由是素心晨夕共歎相見晚維余性簡寡合邇復落

落心知屈指幾盡詎與先生年俱耆艾天假萍緣石訂三生良非偶已滄帆不我棄我亦謂能知滄帆使滄帆得遇盛時出其所學唐爲姚宋宋爲范韓亦奚不可幾者華國文章特緒餘耳迺咕嗶半生僅於綏陽一宰小試其端天意竟何爲者然滄帆自有其真不以窮達而損益故其爲詩天籟獨成言近旨遠雖不求異人而迥不猶人滄帆豈僅以詩傳抑亦不必以詩傳惟其詰嗣暨門人請付梓以期不朽滄帆諾之而徵序於余余竊謂滄帆之詩一滄帆之自寫真也其家庭親故哀感贈答諸篇可以見天性之純厚其弔古論今可以見挾持之遠大其寫景賦物可以見胸懷之淡定若論其宗派則香山栗里白石板橋庶幾近之總之根乎性發乎情其人其言一言以蔽之曰真惟真也故不苟爲同異而泰然神與古游謹以質滄帆何如也